

<><><><><><>

Headlines

- प्रधानमंत्री नरेन्द्र मोदी होरें दिल्ली कार धमाके च घायलें कन्नै मुलाकात किती- दोषियें खलाफ कारवाई दा वायदा कीता।
- उपराज्यपाल मनोज सिन्हा होरें आतंकवाद गी शांति लेई सभ्भनें शा बड्डा खतरा दस्सेया- नागरिकें थमां असमाजिक तत्वेन दी सूचना देने दी अपील कीती।
- जम्मू-कश्मीर पुलस नै कुलगाम ते सोपोर च बड्डे पैमाने पर आतंकवाद विरोधी छापे मारे- जमात-ए-इस्लामी खलाफ कारवाई च केई ठकाने गी निशाना बनाया गया।
- जम्मू-कश्मीर नै रुफटॉफ सोलर च बड्डी प्रगति किती- 54 सौ घरे गी सिफर बिजली बिल थोआ रदे न- 83 ज्हार शा मते घरे गी कवर करने दा लक्ष्य।
- मौसम विभाग नै जम्मू-कश्मीर च 15 नवम्बर तोड़ी खुश्क हालात दी पेशगोई कीती- 16 नवम्बर गी ऊंचाई आहले इलाकें च हलकी बर्फबारी दा अनुमान ऐ।

<><><><><><>

PM LNJP Hospital

प्रधानमंत्री नरेन्द्र मोदी होरें लोक नायक जय प्रकाश नारायण अस्पताल दा दौरा लाया ते सोमवारे राष्ट्रिय राजधानी च होए दे कार धमाके च घायल लोकें दी डोल पुच्छी। प्रधानमंत्री होर अज्ज भूटान दी 2 दिन दी यात्रा मुकम्मल करने मगरा जियां गै दिल्ली पुज्जे तां फही ओह सीधे अस्पताल पुज्जे ते घायलें दी डोल पुच्छी ते उन्दे तौले नरोए होने दी कामना कीती। उनेंगी अस्पताल दे डाक्टरें आस्सेया लोडचदी जानकारी बी दिती गेई। सोशल मीडिया दी इक पोस्ट च मोदी होरें आखेया जे इस खडयंत्र दी साजिश रचने आहलें गी बख्शेया नैई जाग ते कनून तैहत उन्दे खिलाफ कारवाई कीती जाग।

<><><><><><>

LG Terrorism

उपराज्यपाल मनोज सिन्हा होरें आखेया जे आतंकवाद शांति- विकास ते समाजिक सदभाव लेई सभ्भनें शा बड्डा खतरा बने दा ऐ। उनें लोकें गी सुरक्षाबलें कन्नै सहयोग करने ते कुसे बी असमाजिक तत्व दी सूचना देने दी गुजारश कीती। ओ अज्ज पुलवामा दे अवन्तीपोरा च इस्लामिक युनिवर्सिटी ऑफ साईंस एंड टेक्नालोजी दे स्थापना दिवस सरबन्धी तैहत हफ्ते तैहत आयोजित कार्यक्रम गी सम्बोधित करदे होई आखी। उपराज्यपाल होरें आखेया जे आतंकवाद नै त्रै दाहके शा जम्मू-कश्मीर दे नौजवानें पर प्रतिकूल असर पाया ऐ- मगरा अज्ज दे नौजवान अपने सुखने गी साकार करा रदे न- जिसी किश बाहरी ताकतां

बर्दाश्त नेंई करी पार रदियां। उनें 10 नवम्बर गी लाल किले कश होए दे कार धमाके च जान मुआने आहलें दे प्रति बी संवेदना व्यक्त कीती। इस मौके पर बोलदे होई उपराज्यपाल होरें आखेया

<><><><><><>

Kulgam-Sopore Raids

प्रतिबंधित संगठन जमात-ए-इस्लामी खलाफ इक बड़ी कारवाई करदे होई कुलगाम पुलस नै अज्ज जिले भरै च 200 शा मती थाहरें पर छापे मारे। इस अभियान दा मकसद जमात –ए-इस्लामी संगठन दे नेटवर्क ते उंदी गतिविधिएं गी खत्म करना, ते बक्ख-बक्ख मोर्चे हेठ परतियै संगठित होने दी कुसै बी कोशश गी नाकाम करना हा। इस बारे होर जानकारी दिन्दे होई एस.एस.पी कुलगाम अनायत अली चौधरी होरें आखेआ----(वाईट)

तोआई, सोपोर पुलस नै बी जमात –ए-इस्लामी दे नेटवर्क गी निशाना बनांदे होई बड्डे पैमाने पर अभियान चलाए, 30 कोला मते थाहरें पर छापेमारी करियै तलाशी लैती ते आपत्तिजनक समेयान गी जब्त कीता। अधिकारिण आखेआ ऐ जे इनें कारवाईएं दा मकसद प्रतिबंधित संगठन दे परतियै उभरने पर रोक लाना ते खित्ते च रमानदारी ते नागरिक सुरक्षा यकीनी बनाना ऐ।

<><><><><><>

CS Cooperative

सचिव अटल डूलू होरें जम्मू कश्मीर च सहकारिता मैहकमें दे कम्म काज दा जायजा लैने आस्तै इक उच्च सतह दी बैठक दी अध्यक्षता कीती। इस दौरान उनें मुख करी जोर सहकारी सोसाईटिण ते सहकारी गतिविधिण पर दिता। उनें सहकारी सोसाईटिण गी आम सेवा केन्द्रें आहले लेखा कम्म करने पर जोर पाया। उनें ग्रामीण इलाके च कारोबार गी बढावा देने-डैरी मच्छली पालन ते सेहत दिक्खभील सरबन्धी उत्पादें दी गल्ल कीती ता जे ग्रामीण लुकाई दा लाहू होई सकै। वाईट रेवल्यूशन 2 तैहत सहकारी सैक्टर गी बडा मता विस्तार थहोआ ऐ एदे राए इक लक्ख थवा मती महिलाएं मिम्बरें गी लाहू होआ ऐ। मुख सचिव होरें पेशेवराना तौर तरीके, डिजिटल सशक्तिकरण ते जमीनी सतह पर माली समावेशन पर जोर पाया।

<><><><><><>

HC Winter Timing

जम्मू-कश्मीर ते लद्दाख हाई-कोर्ट नै कश्मीर खिते ते केन्द्र शासित प्रदेश लद्दाख दी सारी जिला अदालतें आस्तै स्यालै आहली रुतै दौरान कम्म करने लेई समें दी घोषणा करी दिती ऐ। अधिसूचना मूजब नमें समें- पैहली दिसम्बर थमां लागू होई जागंन ते 31 मार्च 2026 तगर अमल च रौहगंन। इस दौरान सरबन्धत दफ्तर बड्डुलै 10 बजे लग्गोग ते संजा साड्डे 4 बजे बंद होई जाग।

<><><><><><>

Surya Ghar Yojna

जम्मू-कश्मीर “प्रधानमंत्री सूर्य घर मुफ्त बिजली” योजना तैहत उल्लेखनीय प्रगति करा रदा ऐ। 13 ज्हार 6 सौ शा मते रुफटॉप सोलर सिस्टम लाए जाई चुके दे न ते 5 ज्हार 4 सौ शा मते घरें च बिजली बिल (सिफर) होई गया ऐ। आकाशवाणी दे जम्मू संवाददाता नै दस्सेया जे इस योजना तैहत केन्द्र शासित प्रदेश च 83 ज्हार 5 सौ घरें गी बिजली देने दा लक्ष्य रखेया गया ऐ। हुनें तोड़ी छिहत्तर ज्हार आवेदन हासल होई चुके दे न ते 17 ज्हार इक सौ 51 समझौतें पर दस्तख्त होई चुके दे न। डिविजनल ते जिला प्रशासन नै हर जिले च योजना गी सुचारु ते समयबद्ध तरीके नै लागू करना यकीनी बनाने लेई आखेया।

<><><><><><>

Mission Yuva

मिशन युवा उद्यमिता ते जमीनी स्तर पर आजीविका गी बढ़ावा देने लेई पूरे केन्द्र शासित प्रदेश च लघु व्यवसाय विकास इकाइयें (SBDU) ते व्यवसायिक हैल्पलाईन डेस्क (BHD) दे पदें पर भर्ती करा रदा ऐ। एह पैहल व्यवस्था सरबन्धी योजना- वित्त विपणन नवाचार ते क्षेत्रीय कौशल दे अनुभावी प्रशिक्षकें ते क्षेत्र विशेषज्ञें गी बी मिशन च शामिल होने ते उद्यमियें दी अगली पीढ़ी दे निर्माण च मदद करने लेई आमंत्रित करा रदा ऐ। इच्छुक मेदवार missionyuva.jk.gov.in पर ऑनलाईन आवेदन करी सकदे न। एह नौजवानें ते पेशेवरें लेई जम्मू-कश्मीर च ज्हारें लोकें गी सशक्त बनाने च योगदान देने दा इक बड्डा मौका ऐ।

<><><><><><>

Passport Mela

पुंछ जिला प्रशासन- विदेश मामले मंत्रालय कन्नै रलियै पुंछ च त्रै-रोजा पासपोर्ट मेला- जेड़ा जे इस बरे दा जिले च अपने किस्मा दा पैहला मेला ऐ दा आयोजन कीता। ए.सी.आर पुंछ Mohd Sayeed आसेया मेले दा उदघाटन किता गया- जिस च 120 नियुक्ति सरबन्धी Slot उपलब्ध कराए गे- जेड़े सब्भै दंऊ दिने दे अंदर बुक होई गे- जिनें निवासियें गी पासपोर्ट आस्तै पैहले 240 किलोमीटर दूर जम्मू जाना पौन्दा हा- उनें इस पैहल दा सुआगत किता। कोई 120 लोकें गी इस दा लाह थोआ- जेड़ी मकामी लोकें लेई इक बड्डी सुविधा ऐ। आकाशवाणी समाचार कन्नै गल्ल करदे होई ए.सी.आर पुंछ Mohd. Sayeed होरें आखेया

<><><><><><>

Weather

जम्मू-कश्मीर च मौसम 15 नवम्बर तगर आमतौर पर खुश्क रहौग ते आसमान साफ बने दा रहौग। उयां 16 नवम्बर गी उच्चियें धारें पर बड़ी हल्की बर्फवारी होई सकदी ऐ- जेदे मगरा 17 थवां 19 नवम्बर तगर मौसम आम तौर पर खुश्क गै रहौग। 20 नवम्बर गी दपैहरी मगरा बदल छाई सकदे न 21 थवां 23 नवम्बर तगर मौसम बदलोखडा रहौग। लोकें गी सलाह दिती गेई ऐ जे ओह मौसम सरबन्धी हालात बारे जानकार रहौन खास-करी उच्चियें धारें आहले इलाकें च रौहने आहले यात्रियें गी बी अपनी यात्रा दी योजना मौसम मूजब गै बनाने लेई आखेया गया ऐ।

<><><><><><>

Prog. Announcement

आकाशवाणी दा क्षेत्रीय समाचार एकांश 'विश्व मधुमय दिवस' दे मौके पर औंदी 14 नवम्बर गी 30एं मिटनें दी इक विशेष चर्चा प्रसारित करने जा'रदा ऐ जेहदा विषे ऐ डायबीटीज, इट्ज़ काजिज, सिम्पटम्ज़ एण्ड प्रिवेंशन यानि मधुमय एहदे कारण, लक्षण ते एहतियाती उपाऽ। शुकरवारें दिनें ढाई बजे प्रसारित होने आहले इक विशेष कार्यक्रम च स्हाड़े मेहमान होडन जम्मू मेडिकल कॉलेज च एंडोक्रिनोलोजी विभाग दे अध्यक्ष डॉ. सुमन कोतवाल जेहडे शुगर रोग बारै जानकारी श्रोताएं कन्नै सांझी करडन। इन्दे कन्नै गल्लबात करडन स्हाड़े न्यूज एंकर विजय बजाज। एह कार्यक्रम स्हाड़े इससै चैनल पर मीडियम वेव 303 मीटर यानि 990 किलोहर्टज ते एफ.एम 100 इशारिया 3 मैगाहर्टज पर सुनी सकदे ओ।

<><><><><><>

Public-B' Casting Day

अज्ज लोक सेवा प्रसारण दिवस ऐ जेहडा हर बरे अज्ज यानि 12 नवंबर गी राष्ट्रपिता ते स्वतंत्रता सेनानी महात्मा गांधी हुं'दे आसेआ 1947 च रेडियो पर दित्ते गेदे ऐतिहासिक भाषण दे चेतें च मनाया जंदा ऐ। इस ध्याड़े गी लोक सेवा प्रसारण दिवस दे रूपै च मनाने दा फैसला सन 2 ज्हार च उस बेल्ले दियां सूचना ते प्रसारण मंत्री सुषमा स्वराज हुं'दे आसेआ लैता गेआ हा। उत्थूं थमां गै इस मौके पर विशेष कार्यक्रम प्रसारित करदा ऐ ते इस मौके पर बापू गांधी हुंदी पसिंद दे भजन बी रेडियो पर चलाए जंदे न। जिस स्टूडियो थमां महात्मा गांधी होरें अपने संदेश प्रसारित कीता हा उसी बापू स्टूडियो नां दित्ता गेदा ऐ। राष्ट्रपिता हुंदे उस भाषण दा अंश आओ सुनचै

<><><><><><>